

摘藻堂四庫全書薈要

集部

欽定四庫全書薈要

集部

元詩選初集卷二十五




詳校官候選知縣臣吳甸華

欽定四庫全書薈要卷二萬三百八十五

集部

元詩選初集卷二十五 長洲 顧嗣立 編

虞集道園學古錄



集字伯生蜀郡人宋丞相允文五世孫也父汲僑
寓臨川之崇仁以契家子從草廬吳先生澄遊大
德初薦授大都路儒學教授歷國子助教博士累
遷祕書少監翰林直學士兼國子祭酒拜奎章閣
侍書學士命修經世大典進侍講學士文宗晏駕

謝病歸至正八年五月卒年七十有七贈江西行
省參知政事仁壽郡公謚文靖歐陽元功曰皇元
統一之初金宋舊儒布列館閣然其文氣高者崛
強下者委靡時見餘習承平日久四方俊彥萃於
京師笙鏞相宣風雅迭唱於時虞公方回翔胄監
容臺間有識之士早以斯文之任歸之至治天厯
公仕顯融文亦優裕一時宗廟朝廷之典冊公卿
大夫之碑版咸出其手粹然成一家之言家素貧

束脩羔雁之入還以為賓客費雖空乏弗卹也早
歲與弟槃闢書舍為二室書陶淵明邵堯夫詩于
壁左曰陶菴右曰邵菴故世稱邵菴先生先生為
文萬篇存者十二三門人訂其在朝應制歸田方
外諸稿釐為五十卷曰道園學古錄詩稿亦曰先
芝亭永言先生詩與浦城楊仲弘清江范德機富川揭曼碩先
後齊名人稱虞楊范揭為有元一代之極盛先生
嘗謂仲弘詩如百戰健兒德機詩如唐臨晉帖曼

碩詩如美女簪花人或問曰公詩如何先生曰虞集乃漢廷老吏也蓋先生未免自負而公論皆以為然

味經堂詩

并序

以下在朝藁

國子祭酒魯公伯子翬父作味經堂自為記以勗其子遠公嘗命遠從予遊故賦此詩

維昔玄聖有子過庭學禮學詩詔之丁寧面牆之室絲不知味親能使學不能使嗜觀於德容聽於德音詠歌

周旋實悅我心邈乎千載聖往言在舍而不求匪罔斯
殆畏友輩父窮經篤行既有諸躬思貽厥成既蓄既畚
俾稼之食既畋既漁俾鼎之實作堂高明曰子遠來吾
經在茲遠其味之始予虛羸匍匐來食茹草飲水以禦
朝夕窮人得歸自我父師俛焉斯文老至不知煌煌靈
芝如彼嘉玉薄言采之在彼中谷南陽之人來詹來言
君子豈弟宜其後昆

題宋誠甫侍郎垂綸亭

岷源建高駛無游舫漢會其委安流滔滔爰有君子垂
綸其下雖不得魚意甚閒暇援藟引楫至于中沱蔭樹
以休悠悠永歌逝波汙汙不轉維石樂茲忘憂矢言不
食烝然雲興風舉以高鶴翔中天遺景九皋木其落矣
魚亦潛渚睠言夙好除于風雨風吹衣裳彼為栖栖行
吟望予實勞我思山有榛棘河有鯉鯉豈其飲泉必泠
之美君子冠純秩秩大經洄有清酌可以濯纓

高竹臨水上

高竹臨水上幽花在崖陰以彼貞女姿當此君子心春
陽不自媚夕露忽已深湘妃昔鼓瑟悵望蒼梧岑

月出古城東

月出古城東海氣浮空濛車騎各已息宮闕何穹窿牧
馬草上露吹笳沙際風帳中忽聞鴈傳令鼓雕弓

書上京國子監壁

神京極高寒幽居了晨夜雷風無時發零雨每飄灑炎
光不到地蕭爽度長夏大化漠無宰豈必事陶冶揚雄

不曉事守道栖栖者玄經百無徵白髮謾盈把

至治壬戌八月十五日榆林對月

日落次榆林東望待月出大星何煜煜芒角在昴畢草
樹風不起蛩蛩絕啁啾天高露如霜客子衣盡白羸驂
翫餘棧嫠婦泣幽一作空室行吟毛骨寒坐見河漢沒驛

人告

一作趣

晨征曈曈曉光發

憶三十年前與元復初參政同賦秋日梨花元
有句云朝食葉底梨莫看枝上花而忘其後句

因續之云

朝食葉底梨莫看枝上花花開食實後霜風振長柯遠
水良可鑒彩雲亦易過念爾白於雪日莫當如何

李老谷

十轉山崦交九度沙磧溜始辭平漠曠稍接山木秀老
病畏行役慰藉得良覲秋嶺晚更妍寒花晝如繡故園
夫如何朝陽眩霜袖

泰定甲子上京有感次韻馬伯庸待制

翰音迎日轂儀羽集雲路寂莫就書閣老大長郎署為

山望成岑織錦待盈度我行起視夜星漢非故處

至治癸亥

有南坡之變晉王以旁支繼大統

天厯戊辰前續詠貧士一首

目昏畏附火枯坐寒窻中破褐著絮重虛豆兼冰崇病
骨於此時浮屠屹撐空呼兒檢餘歷記日待春風雖欣
解凍近翻驚紀年窮貫酒欲自廣無錢似陶翁

後續詠貧士三首

老骨寒不寐夜長況聞風心悸危欲折跼蹐敗絮中雞
鳴當晨驂馬疥芻不充山童衣百鷄喚之媿怱怱求火
埽木葉庭樹亦已空決起不敢怠曙光屋南東苟遂牛
馬性歸放春草豐

中丞趙世安嘗為伯生請曰虞集久居京師甚貧又病目幸假一外職使

醫文宗怒曰一虞伯生汝輩不容耶當時詞臣之清節如此

歸蜀越關隴棧閣危登天適越河濟隔堰水丈尺間飢
寒迫旦暮舟車計茫然東家有一叟欲去初不言早朝
聽詔畢喚馬闔闔前童奴受宿戒向煖爭相先聞之嗔

兒子我何為汝牽屨無千金賈吾足安暇憐

為政貴察色讀書在研覃司視既不明兩者無一堪尚
不遑吏責為師固宜慚聖世無棄物況茲久朝簪決去
豈我志知止亦所諳頗聞南山下菊根浸寒潭濯餌千
日期冰臚復清涵老馬果識道更服鹽車驂

觀花有感

挂巾花樹枝酌酒花樹下風吹巾上塵花落手中箏清
唱起相壽母遽且聊暇流光急去人莫怪行樂者

赤城館

雷起龍門山雨灑赤城觀蕭騷山木高浩蕩塵路斷魚
龍喜新波燕雀集虛幔開戶微風興倚杖衆雲散

同閣學士賦金鴨燒香

黃金鑄為鴨焚蘭夕殿中窈窕轉斜月逶迤動微風綺
席列珠樹華鐙連玉虹無眠待顧問不知清夜終

退直同柯敬仲博士賦

月下白玉階露生黃金井疎條栖鵲寒哀蕙流螢冷戀

闕感時康懷歸覺宵永晨鐘禁中來白髮聊自整

題儋耳東坡載酒堂二首

翳翳儋耳城歷歷枕椰樹百年遺故丘新堂設賓酢清
風海上至朝陽在庭戶丹山五色鳳覽德屢來下甘辛
孰桂酒羅列雜諸蘋苻黎多孫子食飲祭先具蛟龍波
浪深歸來風雨除

鑿井得甘泉渴者恒自私流潤不擇地委順復何疑海
南絕風雨水木況華滋鄰舍解讀書諸生還誦詩何必

懷故都聊樂宜在茲星河渡白鶴山月懸蛾眉來晚去
何速勞人千載思

盜發亞父塚

彭城有盜識寶氣于亞父塚上發之得一劍云

盜發亞父塚寶劍寶累之塚開寶氣盡獄吏書盜辭盜
言惟見寶寧知亞父誰項王不相信弟子遂輿尸黃腸
下深錮千歲復何為大河繞城東落日在城西過客立
城下踟躕望安期

步虛詞二首

步虛長松下流響白雲間華星列燿火明月懸珮環肅
然降靈氣穆若愉妙顏竹宮愴清夜望拜久乃還
朱光出東海高臺迎赫曦六龍獻陽燧九鳳保金支鍊
丹軒轅鼎濯景崑崙池拜賜冰玉佩玄洲共遨嬉

記子昂畫

春風動蘭葉庭戶光陸離言收竹上露石角挂練衣車
行不擇路采苾苾何楚楚遊子愴忘歸徘徊歲云莫

送西臺治書仇公哲

陝郊得時雨生意始來復存者事稼穡還者葺牆屋安
知凋瘵餘政可致新福闢除正廣術區井表深瀆均齊
定恒志忠厚保敦篤豈無憂世士受仕在芻牧為義苦
多違好名常不足治書肅將指善類庶有勗

送張道士歸上清

白雲盱水上自古多仙人手攜綠玉杖頭戴白綸巾袖
中出風雨天上禮星辰歸來庭戶靜芳草自生春

日出行

日出上城府日莫當蚤歸城門已擊柝出郭何馬依下
馬投館人空垣月當扉涼風振庭樹巢鳥屢驚飛起坐
搔白髮忽如霜草稀周公不復夢仲尼故沾衣老萊有
孺色傳聞惟食薇求之事已晚徘徊行道微

贈寫真佟士明

佟郎居上京閱人如風花拈筆寫其似千歲畱英華邇
來七十年將相紛在目來者有如此往者那可續昔我
初北遊面白鬢如鴉點染煩粉墨華星映丹霞今如雪

中松苦硬雜蒼白却視當年容邈如不相識不識當如
何臨風且長歌黃雲接河漢白雪漫陂陀乞身願歸老
吳蜀山總好贈君千黛螺翠色秋可埽

寄陳衆仲助教上都作

學省足清晝詞垣驚蚤秋美人隔河漢落月在高樓持
衣未成曲吹笛不勝愁還趨鴉鵲觀別製鵲鵲裘

題商德符華山圖

昔祠雲臺館行穿御階柏夕陰嵐氣深重碧照行客獨

訪張超谷漸覺巖險迫冰生玉井頭日射仙掌側豈無
鐵鎖懸翻身若飛鶻恐煩華陰令不奈昌黎伯王事況
有程車馬何忽忽流觀終南山周覽天府國爾來十七
年欲往不再得山河想邈悠傷殘轉蕭索摩挲商老圖
彷彿希夷宅高哉蓮華峯白雲澹秋色

賦茅山道士雲松巢

昔年李太白廬山思結巢褰雲自天上和鶴止松梢道
士潘閑遠高居古大茅誦經門卧虎看劒石眠蛟飛步

脫鳬舄長吟吹鳳匏九江攬秀色許爾作神交

題李漑之學士白雲半間

山中多白雲何由到城邑招之恐不來欲攬遽無迹棲
檐候晨光納牖作秋色用冲不為盈常住寧若客分張
任蒼松散落還白石日照香爐峯月射仙掌側有恩封
一鄉與子當共食

為范尊師賦雲林清遊

大茅千仞下結屋三四楹雲林戶牖潤鶴去海天平坐

上發長嘯人間聞玉笙
斲苓春霧重煮朮晚烟輕
綠室噓丹氣蒼崖受日精
樵遺伐木斧真降引霓旌
九鼎金還就千齡樹不傾
問誰解居此云是范長生

送李彥方閩憲

并序

文監李公彥方出貳閩憲同朝羣公皆賦詩以為
贈彥方屢擢臺職激揚之宜有不待予言者適有
一事深有感于愚衷先正魯國許文正公實表章
程朱之學以佐至元之治天下人心風俗之所係

不可誣也近日晚學小子不肯細心讀書窮理妄引陸子靜之說以自欺自棄至於移易論語章句直斥程朱之說為非此亦非有見於陸氏者也特以文其猖狂不學以欺人而已此在王制之必不容者也閩中自中立之歸已有道南之歎仲素愿中至于元晦端緒明白皆在閩中不能不於彥方之行發之去一賊吏治一弊政不如此一事有以正人心儒者之能事也集卧病目眚尤甚援筆書

此云

七閩去天遠顛連苦無告牧人受深寄昧者復為暴犀
象雜金貝飢渴劇飫膏大言相鄙夷饜奪心自校豈無
循廉吏實病黑白撓聰明屬旒黷聽熒資所到李侯金
閨彥圖史擅讎校晨聞大夫奏夕理武夷棹君子慎修
職寧適豐廩稍蕉荔甘多毒薑桂老堪芼所懷延平翁
揚休似明道授受有源委精微足深討言立聖如在表
正愚可造師匠久不興真妄如枘鑿云何誚支離肆誕

長兇傲異言古所誅末學足深悼閩雖在海隅前聞此
淵奧正誼從簡編良俗宜善導贈言不及它持此永為
好

題鄭秀才隱居

陶翁昔好菊荒徑不暇鋤素琴初無絃名酒亦屢虛雖
有二三子薪水不讀書淒涼千載下高名將焉如不如
鬼谷洞鄭子樂有餘種菊以為田田中更為廬善藥不
二價詠觴送居諸有子揮五絃涼風在庭除時來青田

鶴亦出濠梁魚昨者遊京師侯門曳華裾捧檄忽一喜
翩然告歸與芳蒲采甘露玉漿釀清醕老父坐堂上穉
子具籃輿晨遊南山陞莫濯清水渠席間撫猗蘭房中
詠關雎以此得高壽何必南陽居

題朱邸竹木

猗猗淇園竹結根磐石安枝幹相扶持風雨不可干其
實鳳所食君子思保完恒恐聲影疎蕭條霜露寒金玉
慎高節千載承清歡

詠史

軒后邈已遠漢武亦雄哉荒忽九州外百年過烟埃變
化庶長久臨海築層臺黃金靡鏤飾喬林摧斷裁樂通
竟先死孫卿殊未回不知作者意空令來者哀奉盤泣
繁露馳道殷奔雷志氣昔所在風雲恒往來

賦蘇伯修滋溪書堂

滋源恒伏流春雨川乃盈林疇廣敷潤草木俱繁榮臨
深見遊儵仰喬有鳴鶯君子樂在斯齋居托令名積學

抱沈默時至有攸行抽簡魯史存采詩商頌并禹穴追
馬公湘江歌屈生紉蘭不盈握伐木有餘情浩然欲浮
海歸興還濯清方舟我為揖白髮媿垂纓

送張兵部孟功巡河分題得屋上烏

花發上陽春門開未央曙城柝起羣棲流光散朝羽息
影須近檐結巢願當戶輓轡轉金井終日灌嘉樹

賦水木清華亭

中流泛蘭枻望彼嘉樹林落日蕩野水浮雲生夕陰游

魚戀芳藻好鳥鳴幽岑為樂恐易老吾將脫朝簪

于仲元舍賦紅梅

白雪不成夜丹霞遂崇朝妙質承日映飛英何風飄醉

來紅袖近歌罷綠雲消揚州問何遜何似董嬌饒

宋公傳元

詩體要特載陰何體所錄虞文靖之詩為多文靖有詩云少陵愛何遜太白似陰鏗亦舉其所好言之也

賦洛川老人九十

洛川老人年九十須眉如畫身玉立錦袍金帶方烏巾
手挽強弓無決拾八月平原秋氣高聞有狡獸依蓬蒿

清晨上馬薄莫返累騎毛血懸韃橐身是前朝將家子
生逢太平百無事都將英氣化高年何物小兒堪指使
太守上言朝有恩東帛養牛魚上尊洛川老人過百歲
擊壤為歌傳子孫

張令鹿門圖

張侯襄陽人深知襄陽樂十年宦學懷襄陽故托豪鱣
寫山郭老我不樂思蜀都人言嵩陽好隱居三十六峯
常對面水竹田廬還可圖欲往不能心慄慄忽見新圖

被山惱沙禽浦樹俱可人金澗石牀為誰好向來耆舊
皆英雄駕言從之道焉從弄珠月冷識遊女沈劒潭深
知卧龍八月霜晴水清淺聞道扁舟足迴轉何時古寺
傍檀溪幾處殘碑在江峴呼鷹臺高秋草多養魚池中
蓮芡波蜀嵩未必不如此我今不遊奈老何張侯張侯
早結屋莫待史詹為君卜要看隴上課兒耕好在魚梁
白沙曲

湛湛行

湛湛天宇玄以黝星白如銀垂近人牛羊散漫草多露
大帳中野傍無鄰去年八月羽書急婦女上馬小兒泣
今年八月天子來身屬橐鞬月中立

家兄孟修父輸賦南還

大兄五月來作客八年不見頭總白五人兄弟四人在
每憶中郎淚沾臆我家蜀西忠孝門無田無宅惟書存
兄雖筦庫實父廕第竊微祿

一作餘澤

承君恩文章不如仲

一作孟

氏好叔氏最少今亦老五郎十歲未知學嗟我何

為長遠道諸兒讀書俱不多又不力耕知一作將奈何憂

來每一

一作惟

得二三友看花把酒臨風哦

一作歌

蜀山嵯峨

歸未得盤盤先壠臨川側碧梧翠竹手所一作自

移應與

青松各千尺南風吹雪河始冰兄歸烏帽何累累明年

乞身向天子共讀父書歌太平

子昂墨竹

子昂畫竹不欲工腕指所至生秋風古來篆籀法已絕
止有木葉雕蠶蟲黃金錯刀交屈鐵大陰作雨山石裂

蛟龍起陸真宰愁雲暗蒼梧泣湘血吳興之竹乃非竹
吳興昔年面如玉波濤浩蕩江海空落月年年照秋屋
商德符畫幽篁古木

湘君宮在洞庭湖幽篁古木龍所都石壇雨長碧苔蘚
水屋風動青珊瑚老人欹枕看螻蟻嫠婦停舟聽鷓鴣
江南蜀道問來往商公商公今有無

為達兼善御史題墨竹

蜀道荒涼多古木篋簞千尺相因依小年慣見今白髮

杜宇夜啼愁不歸老可嘗作陵州守古墨蛟龍多入手
春雷每恐破壁去神鼎空令夔魃走丹丘越人不到蜀
脩葉何以能縱橫內府人家爛熳寫使可見之心亦驚
江南御史龍頭客暫別那能不相憶知君深識篆籀文
故作寒泉溜崖石

畫鶴

薛公少保昔畫鶴毛羽蕭條向寥廓通泉縣壁久微茫
故物都非況城郭長鳴闊步貌閑暇解寫高情亦奇作

田中芝草日應長石上松花晚猶落赤壁江深孤月小
白雲野迴秋霄薄庠帝相從絳節朝八公許製黃金藥
誤嬰塵網迹易迷移台中洲夢如昨借懸素壁憶真侶
忽有微風動林壑碧虛寥寥積雪高直過蕭臺絕樓泊

寫廬山圖上

憶昔繫船桑落洲洲前五老當船頭風吹雲氣迷谷起
霜墮楓葉令人愁高人祇在第九疊太白一去三千秋
石橋二客如有待裹茶試泉春巖幽

題旦景初僉司畫

旦公山堂城東南畫圖古檜何毵毵城中無山有山癖
直藉豪墨窮幽探旦公彈琴古檜下鬱鬱窗戶生晴嵐
春雨時來鶴鳴谷秋聲夜作龍吟潭先皇晝坐羣玉府
內使趣召飛雙駿畢宏韋偃出中祕營丘北苑開滕緘
是時旦公主舒卷一二文士相交參旦公歸來坐成想
亦頗拈筆為梗楠伯熙奉詔每有作礪砢相並將無慚
嗟余懷歸亦已久摩挲老目百不堪山中豈乏真偃蹇

可容白髮抽朝簪

題柯敬仲畫

并序

予先世居隆州州治之後山石室翁守郡時隆為
陵州州事簡時來就吾家拾故紙背作茅蘭竹木
之屬所得頗多吾幼時尚收得數紙今亦亡之丹
丘生用文法作竹木而坡石過之近又以新意作
墨花甚妙從子悅有眉山學官之行丘為作此予
愛而賦之

昔者老可守陵州守居北山吾故丘太守時來看山雨
每畫紙背成滄洲老蒲松烟色過重揮霍陰崖交劒矛
百年離亂亡故物敝篋江南誰復收新圖貧簞枝葉脩
使我不樂思昔侯碧雞祠前杜鵑叫玉女井上叢篁幽
棠梨樹高青子落碧花翠蔓縈牽牛揚雄無家不歸老
蠨蛸蟋蟀寒相求丹丘先生東海客何以見我空山秋
蕭條破墨作清潤殘質刊落精英留陂陀重複分細草
山石縈紆生亂流眉山學官莫厭冷言歸故鄉非遠遊

石田茅屋儻可得萬里欲上東吳舟
百花潭深濯新錦持報以比珊瑚鈎

白翎雀歌

烏桓城下白翎雀雌雄相呼以為樂
平沙無樹托營巢八月雪深黃草薄
君不見舊時飛燕在昭陽沈沈宮殿
鎖鴛鴦芙蓉露冷秋宵永芍藥風暄
春晝長

題簡生畫澗松

簡生與我皆蜀人留滯東南凡幾春
每拂齋紈作山水

使我感慨懷峨岷如此長身兩松樹滿谷悲風散陰霧
雌雄如劍變為龍鱗鬣齊成擘崖去祕閣嘗觀韋偃圖
蒼潤雄深世所無默識形神出模畫把筆莽蒼增嗟吁
玉堂寶書本同館官府既分難復見摩挲新墨慰衰朽
鬢雪飄蕭數開卷昔我樵牧青城山坐起政在雙樹間
當時簡生若相見應并寫此聽潺湲劉郎集賢好賓客
好著幽窗對晴碧凌靈為我哦七言有鶴飛來破秋色

題柯博士畫

磯頭風急潮水長蒹葭蒼蒼繫魚榜青山一髮是江南
白頭不歸神獨往幽篁繞屋茅覆檐木葉脫落秋滿簾
買魚沽酒待明月定是黃州蘇子瞻子瞻文章世希有
謫向江波動星斗夜投斷岸發清嘯棲鶻驚飛怒蛟吼
圖中風景偶相似欣然揮灑春雲開子瞻應是念鄉里
還化江東孤鶴來

題高彥敬尚書趙子昂承旨共畫一軸為戶部

楊侍郎作

高文簡公一日與客遊西湖見素屏
雅潔乘興畫奇石古木數日後文敏

公為補叢竹後為戶部楊侍郎所得
虞文靖公題詩其上此圖遂成三絕

不見湖州三百年高公尚書生古燕西湖醉歸寫古木
吳興為補幽篁妍國朝名筆誰第一尚書醉後妙無敵
老蛟欲起風雨來星墮天河化為石趙公自是真天人
獨與尚書情最親高懷古誼兩相得慘淡酬酢皆天真
侍郎得此自京國使我觀之三歎息今人何必非古人
淪落文章付陳迹

題灤陽胡氏雪溪卷

去年予與侍御史馬公同被召出居庸未盡東折
入馬家窰望縉山度龍門百折之水登色澤嶺過
黑谷至于沙嶺乃還道中奇峯秀石雜以嘉木香
草輦道行其中予二人按轡徐行相謂頗似越中
但非扁舟耳適雨過流潦如奔泉則亦不甚相遠
郭熙畫記言畫山水數百里間必有精神聚處乃
足記散地不足書此曲折有可觀恨不令郭生見
之灤陽胡太祝乃以雪溪自號豈所見與予二人

同乎然灤水未秋冰已堅尋常已不可舟況雪時
耶當具溪意云爾因為賦詩云

積雪平沙陰山道射虎殘年不知老豈識船如天上坐
翠竹為帷樹為葆昔乞鏡湖苦不早白髮如絲照清潦
他年此地若相逢應著漁蓑脫貂帽

題楊友直檢校所藏李營丘枯木圖

老龍出海蒼髯鬚營丘枯木天下無回枝屈鐵墮崖雪
澗底應拾青珊瑚明堂清廟要梁棟朔風吹沙澤腹凍

老身不用歎遲莫按圖來求萬鈞重

酬蕭侯送蒲萄

蕭侯昔致蒲萄苗山童不灌三日焦宛西上品復親致
手種窗南自澆水一月當生一尺長移向江頭薜荔牆
秋深雨足馬乳重舉囊石壓青霞漿是時蕭侯當走馬
來訪衰翁茅屋下酒酣舞劍傾一尊不信金盤露如瀉

題袁塵騶圖

驂騶食粟石每既立仗歸來汗如洗脫羈展轉聊自恣

落花塵土隨身起君不見春雷起蟄龍欠伸霧擁雲蒸
九河水

林皋亭

九月天氣肅鶴鳴在林陰使君甚好客來者總能吟紅
樹秋山近黃華夕露深鄰翁八九十有酒即相尋

題子昂長江疊嶂圖

昔者長江險能生白髮哀百年經濟盡一日畫圖開僧
寺依稀在漁舟浩蕩回蕭條數根樹時有海潮來

送先隴二鄰僧還吳

蘭若背山陰松筠夾徑深
門閑容虎卧湖近聽龍吟
雨過泉添澗風飄磬出林
衲衣皆舊識一一謝幽岑

次韻阿榮存初參議秋夜見寄

寓館城門夕高秋雨露開天
垂華蓋近月轉紫垣來疏
闊思良會淹留到不才
深期謝安石揮塵散風埃

雪谷早行

積雪擁柴門行人稍出邨
溪頭或遇虎木末不聞猿
接

棧迴山閣支橋就樹根驅車上重坂回首見朝暾

雪巖樓觀

高閣丹青起中天紫翠分窻當太白雪門俯九疑雲伐
木山人去吹簫帝子聞塵中歸未得春思轉紛紛

送人之劔閣倅

往年登劔閣快馬著春衫設險懷前賦摩崖覓舊劖鄉
人遊雪界郡倅試冰銜歸道觀新政春江不挂帆

寄子山尚書

竹色侵衣碧重簾
雨氣深白鷺翻墨
沼紫燕入書林北
海春尊側西山夕
閣陰東曹公事少
歌舞散黃金

漫興

雨閣添衣潤風簾
隱几高白頭更事
少病目向書勞南
客傳音信東家問
酒醪江邊茅屋破
歸揖若為操

送張尚德

并序

史館薦張尚德為
檢閱官朝廷以為
宜稱可其請未奏
也有司以闕簿注
新進士尚德頗有
聞即歛

裳宵逝噫進退若是可以信史館之薦人矣予力
雖不足以留之亦終不敢失之也故作是詩以餞
之

六月初聞雨官河潦水生江南歸宋玉稷下謝荀卿鵬
鶚青霄迴蒹葭白露盈都留詩興在來聽上林鶯

寄丁卯進士薩都拉天錫

鎮江錄
事宣差

江上新詩好亦知公事閑投壺深竹裏繫馬古松間夜
月多臨海秋風或在山玉堂蕭爽地思爾佩珊珊

明皇按樂圖

新度霓裳曲三年教得成
驚鴻渾不下飛燕若為輕
芍藥春亭莫芙蓉野水生梨園
多白髮吹笛到天明

送長沙守

白髮長沙守循良又好文
近辭金馬去遠有王魚分
對竹聽湘雨開簾看嶽雲
漢廷思賈誼一飯莫忘君

代衆仲作

昔在泉州住將軍每見招
春雲山對屋夜雨水平橋
池

鴨穿荷葉溪魚上柳條禁城鐘鼓起車馬晚蕭蕭

送王照磨之官雲南

遺廟珍珠浦歸舟楚道溪飛鳶愁暑雨走馬畏山泥官署尊丹鷺祠官勝碧雞題詩遠相送紅日五雲西

玉堂燕集圖

朝廷多暇日別館又青春薄醉猶催酒清歌況有人玉堂金硯匣翠袖白綸巾老去渾無賴憑誰為寫真

畫檜

茅山多古樹此檜更長生
鶴鶴棲來穩蛟龍化得成
雲深還近戶月落似聞笙
千載如相見蒼然故舊情

贈楊友直

雒陽楊友直字儼漢中郎
畫若錐穿石垂如雨漏牆
舞花羞女美醉草笑僧狂
昨日鴻都學煩君寫數行

題朱邸竹木

江上復春雨曾陰覆碧波
石高龍影卧林迴鶴聲過
解珮猗蘭浦揚旌落木坡
佳人翠袖薄日莫欲如何

赤壁圖

過鶴生新夢攜魚憶舊遊清霜凋木葉落月湧江流
隱者時一作誰堪訪良田亦易求如何玉堂夜白髮不勝愁

八月八日有感題視草堂壁

載筆趨芸閣探囊索縕袍坐銷秋日淨心折夜風高
識字頭先白謀生計轉勞文園多病渴常想賜蒲萄

賦程氏竹雨山房二首

春雨過山竹幽泉繞舍鳴燕泥書帙晚魚浪釣絲晴奉

席從孫子連牀總弟兄舊聞林下叟讀易到天明
遊子聞春雨思親望故園竹間開几席花底注山尊累
世書連屋頻年稻滿邨卜鄰淳朴地絕學欲重論

戲作試問堂前石五首

試問堂前石來今幾十年衰顏空雨雪幽致自風烟微
醉寒堪倚孤吟靜更眠舊湖春水長誰繫釣魚船
為問堂前石何年別太湖春風神不王夜月影長孤不
中明堂柱空餘艮嶽圖頗思嘉種木歲晚與相扶

為問堂前石何無藤蔓纏金蓮疑可致紫菊若為妍
舊夢遺波浪閑情閱歲年祇緣相識久親為濯清泉
碣石久淪海女媧曾補天乾坤遺藁爾霧雨護蒼然
淬劍龍隨化彎弓虎自全昔賢多賦此誰賦最流傳
為問堂前石屢逢堂上人遠來嗟最久獨立與誰鄰
運載勞車馬摩挲識鳳麟鑒車書吉日追琢到嶙峋

代石答五首

幸自鄰頑鄙毋煩問歲年當寒金作礪向煖玉生烟
眉

黛無歸意毛羣有叱眠涼州三百斛亦未酹觥船

昔觀一柱觀還度幾重湖雪盡身還瘦雲生勢不孤
穿鄴臺瓦賦就草堂圖芝閣玄雲在危蹤敢藉扶

牛角何堪礪蝸涎謾自纏沈冥辟邪古羞澀望夫妍
神物須清鑒靈根屬小年金輿曾共侍千載憶甘泉

轉徙寧論地存留亦信天露盤危欲折却火不同然
雄下殘經斷岐陽數鼓全向無文字托寂莫竟誰傳

去歲留詩別嗟哉白髮人冠依子夏製居切左丘鄰
執

籥充振鷺修辭綴獲麟終須愁坎壈勿用誚嶙峋

道園嘗以

江左先賢甚衆後生晚進知者蓋鮮欲取元裕之中州集遺意別為南州集以表章之以病目而止

送魯子翬廉使之漢中

封上頌臺禮輕車入漢中節毛吹渭雨木葉動秦風把
酒臺基古馳書歲事豐朝回倚西閣日日數歸鴻

立春夜試墨

輕雪作春花飛來入鬢斜紫貂迎曉霧絳蠟炫晴霞書
詔頻趨閣思歸即借車幾時將穉子隨意踏江沙

次韻筠軒司徒足成旦公所藏英宗御題之句
元題曰日光照吾民月色清我心又題琴曰至
治之音二首

化國多長日高人侍紫宸觀書從上相屬筆念生民雲
漢文章備風雷號令新惟應青簡在能載古風淳
御翰龍池曉繙經驚殿陰雲依清靜葉月印妙明心千
載堂堂去諸天肅肅臨朱絃誰為鼓至治有遺音

正月十一日朝回即事

宮樹春陰

一作光

合霓旌拂曙來天光臨閣道雲氣轉蓬

萊晝漏沈沈鼓晨尊醴醴杯香霏簾底霧樂殷殿前雷
祥瑞儀曹奏珍淳尚食催舞庭分鷺序效獻過龍媒融
雪微生草輕風不動埃老人南極至王母上方回玉色
何多喜金華得重陪裁詩賀新雨西閣待門開

贈別兵部崔郎中暫還高麗即回中朝

束髮來東海從軍護北門珠光連旭景玉氣達春溫淵
靜龍含德門嚴虎列屯從容參幄帳慷慨屬橐鞬拜表

推黎獻趨朝謁至尊雲依溫室樹星入紫微垣不道璠
璣貴仍嬰筦庫煩利行雖近市義守不窺園春遇忘身
得危難欲手援懷邦維父母於國實甥婚草草還羈勒
原原致壁殮魯連名竟重箕子教應存簡在從當日扶
持系宿藩清宮風肅肅驂乘火煇煇帝所為郎重王家
報禮悖暫伸桑梓敬未愛李桃繁神闕秋期蚤康侯晝
錫蕃九成思閣鳳六月待冥鵠

次韻李侍讀東平王哀詩

宇宙生奇變，明良陷逆圖。傳聞昏白晝，悲憤結全區。治
極機潛否，恩深事失謨。犯車仍斷軌，壞戶竟傷樞。魑魅
嫌明鏡，強梁忌雅模。甘心成首禍，藉口肆羣腴。隱忍危
衝決，憑陵善唯俞。自天僉鈇鉞，累月具簞壺。裹草疑亡
地，招魂競出都。笳鳴殘夕月，馬僨四交衢。所痛倉皇際，
將無古昔殊。腹心何蠱蝕，肘腋不支梧。列位多翹楚，干
城總豹貙。詎言歸厄數，不復頌貞符。天討公無赦，皇心
愛不姑。報讎論婉孌，錫爵酹嗚呼。相業今如在，民生實

少痛誰能疵璧玉唯有泣瓊珠執簡書羣盜當關欠一
夫馳奔嗟薄日沐浴止中途決去思投關違之或汎湖
危知無復死恨不奮前誅春雨煩冤滌朝陽瘋思疎謳
吟申感慨述作懼荒蕪芒忽思離散焄蒿起苑枯神還
寓岳峻氣直斗杓孤陟降先皇側回翔造化徒英靈常
會合瞻想豈虛無

送陳碩

并序

莆田陳氏慶厯名法從故家也自衆仲來京師集

得友焉凡問學修己之事有益於愚陋多矣又從
知其父兄之賢也問所自出則南塘趙氏信乎其
學之有傳矣嘗以其從子碩來見子愛其端謹可
望南歸省父衆仲送之以文子不能忘也乃賦詩
曰

六歲過閩郡書聲憶滿城目盲今子夏心醉昔延平爾
叔同游息吾文媿老成每分重席煖相對一燈明遠海
乘桴意高山伐木情願攜叩竹杖往看離支生辟稼青

衫舊趨庭綵服輕為言穿木榻亦未厭藜羹寶瑟留飛
鴈蘭舟及嚮鶯佩懷湘渚贈綬向會稽迎去去江雲濕
飄飄島霧清重來知有意時我已歸耕

奎章閣有靈璧石奇絕名世御書其上曰奎章
玄玉有勅命臣集賦詩臣再拜稽首而獻詩曰

禹貢收浮磬堯階望喬雲自天承雨露拔地起絢擊
拊磬音合衡從玉兆分巨鼃三島力威鳳九苞文辨位
資乾坎為山鎮幅員固知興寶藏不假運神斤書帙侵

春潤香爐借宿薰烟光晴冉冉波影畫泫泫融結繇元
化登崇荷聖君瑞於龜出洛重若鼎來汾柱立尊皇極
磐安廣帝勳詎云陳祕玩因願獻前聞

送袁伯長扈從上京

日色蒼涼映赭袍時巡母乃聖躬勞天連閣道晨留輦
星散周廬夜屬橐白馬錦韉來窈窕紫駝銀瓮出蒲萄
從官車騎多如雨祇有揚雄賦最高

贈星上人歸湘中

潭北湘南無影樹一花吹度海門潮天香滿室定初起
雲氣上衣身欲飄寶月夜寒龍在鉢銀河秋近鵲成橋
豈無一箇邛州竹與爾松根共寂寥

子昂秋山圖

翁昔少年初畫山丹楓黃竹雜潺湲直疑積雨得深潤
不假浮雲相往還世外空青秋一色窗中遠黛曉千鬟
瀛洲雞犬同人境尚想翁歸向此間

謝茅山主者贈白羅氎衣請為作大洞祖宗師

四十五贊

鶴氅裁成雪色新
仙翁持寄感情真
清高自此全拋俗
寬博由來穩稱身
佩玉洞聞雲外響
劍光飛射日中塵
畫圖寫向羣真裏
便是揮毫贊詠人

送莫京甫廣憲經歷

延春閣下承恩日
是我經帷侍講時
方擁青編臨綺席
遙看朱紱拜丹墀
風微細草鳴珂珮
日煖飛花近鬢絲
上憶遠人常軫念
莫言南海是天涯

歐陽元功待制入院後僕以魚領成均辰酉甚
嚴絕不得相見今夜當同宿齋宮賦此先寄并
簡謝敬德脩撰

學省初魚禁直稀故人同署却相違食餘苜蓿承朝日
坐候棠梨過夕暉

成均堂東有棠梨樹日影至則師生始散二十餘年矣

預喜奉

祠秋寺燭定知催襆早朝衣今晨瘦馬經門巷想擁青
綾尚掩扉

次韻張蔡國公淡菴青山寺詩

相國觀山負夙期聖恩祇許暫相違身隨雲影留三宿
心了泉聲絕百非開士談空依寶樹野人耕雨薦山薇
雙龍深護安禪處繞坐諸天近紫微

次韻國子監同官二首

坐隱烏皮髀肉消諸生應笑嬾邊韶階前老馬隨秋草
袖裏遺編俟早朝乞米西鄰晨有粥留家南國暑無綃
經明亦是歸耕好清夢無時萬里橋

學宮南直禁垣陰假寓惟愁兩臂沈一曲鏡湖遺老事

三年經幄小臣心
銀河回夜天逾近
草徑迎秋露轉深
珍重鄉人居巷北
時能來往和鳴琴

次韻馬伯庸寶監學士見貽詩并簡曹子貞學士
燕信臣待制彭允蹈待制

禁廬曉直夾城西
經筵龍光映壁奎
繞閣浮雲飛野馬
當階生草伏馴麋
雷行已識天無妄
風烈唯聞帝弗迷
徒積寸誠無補報
每還冰署欲雞栖

鼇峰者國史院庭中石名也伯寧御史為僕言

自其先公時與諸老名勝賦詩者蓋數百篇今
玉堂無本而御史家具有之且曰峰所托差低
盍稍崇其址乃八月五日既克如命因賦此以
報且請錄示舊詩補故事以傳云

視草堂前石一拳何人移置自何年久憐翠色連重地
故拔孤根近九天俯仰百年承雨露等閑千尺接雲烟
故家御史遺書在為錄黿峯舊賦篇

題南野亭

門外烟塵接帝局，坐中春色自幽亭。
雲橫北極知天近，日轉東華覺地靈。
前澗魚遊留客釣，上林鶯轉把杯聽。
莫嗟韋曲花無賴，留擅終南雨後青。

次韻伯庸尚書春莫遊七祖真人菴兼簡吳宗師二首

石渠承雨作流泉，中有參差荇菜牽。
花近飛觴魚駭逝，柳低步障燕隨穿。
紅塵朝路常參吏，清晝齋居幾劫仙。
但乞會稽尋賀監，酒船一棹水中天。

一住京華三十年
春花秋月謾相牽
高情總付珠簾卷
危坐空餘木榻穿
水曲停驂新袂事
牆陰題字昔遊仙
動成陳迹多惆悵
安得長生老後天

觸石墜馬卧病蒙恩予告先至上京寄漑之學士敬仲參書二首

翠幄臨都尚駐郊
言瞻龍漠度前茅
雨餘草氣千原合
日下雲章五色交
給札脩辭持玉筆
賜羹充腹出珍庖
白頭感遇知何補
阿閣清嚴栖鳳巢

趨名顛隳歎目昏旋聞予告荷深恩藥頒西域千金劑
酒賜初筵九醞尊默憶舊書忘晝永行吟冷暑覺春溫
摩挲素壁光於雪思得參書寫樹根

雲州道中數聞異香

雲中樓觀翠宮堯載道飛香遠見招非有芝蘭從地出
畧無烟霧只風飄玉皇案側當霄立王母池邊向日朝
却袖餘薰散人世九天清露海塵飄

次韻楊友直北行道中

蕭蕭戎馬昔升虛壯士吹笳慘不舒闕外羽書三月急
道傍茅舍百年餘沙田雨足仍生黍河水冰消不禁漁
洛下賈生猶獻策平明立在玉階除

王儀伯參政見和郊字韻詩復用韻敘謝二首
龍游宮沼鳳游郊通水明堂不翦茅縣蕝草儀三日具
大亨饗帝五雲交執輿已信神為馬和鼎寧容祝代庖
八月涼風張樂地頌聲洋溢播雲巢

聖遠言湮感墊昏河汾千載最知恩垂紳論道稱前古

東髮明經奉至尊車騎身從游汗漫庭闈心在視寒溫
朝回未覺歸途晚斗柄西移揭角根

次韻馬伯庸尚書

邃閣晨趨禁掖西莫街騎馬及雞栖退朝每想花邊散
得句應從竹上題賜被南宮無宿火齋居方丈有蒸藜
鳳池何似承明近久候文星共聚奎

二十五日即事呈閣老諸學士

松陰鵲立候宮車風送飛花著白鬚水影漸移簾側畔

鶯聲祇在殿東隅
近牀擬進名臣操
載筆親題列女圖
太液雨餘波浪動
龍舟初試散魚鳧

賦礪山成簡卿心遠亭

作亭臨河河水渾
草樹繞屋啼鳥聞
夢回枕上彭城雨
目送檐間芒礪雲
歸來黃菊有佳色
坐老青山無垢氛
但願尊中長得酒
曲阿莫問舊參軍

謝吳宗師送牡丹并簡伯庸尚書

輕風紫陌少塵沙
忽見金盤送好花
雲氣自隨仙掌動

天香不許世人夸青春有態當窻近白髮多情插帽斜
最愛尚書才思別解吟胡蝶出東家

送進士劉聞文廷赴臨江錄事

清江百尺石為城太華千峯積雨晴官府幾時書帙靜
漁舟盡日釣絲輕故家好訪春秋學上國多傳月旦評
頗有老懷煩錄事到州為問范先生

大廷策士問經世之道僕忝在讀卷之列觀諸
進士所對有感賦此錄以贈別錨性粹中支渭

興文舉二賢良

昔人有欲問先天林下相期二十年已向塵埃成白髮
尚從燈火事青編獲麟遂訖春秋後鳴鳥猶聞禮樂前
春雨未來農事晚獨懷歸計在山田

羅朋友道擢高科拜官還崇仁賦此為別

重溪疊嶂竹交加曾著芒屨踏白沙名勝多年嗟寂寞
文章此日羨才華青雲步武纔重見白屋詩書尚幾家
鄉邑相逢煩告語好敦忠信作生涯

白沙友道居近之
昔崇仁有何同父

尚書李公父舍人墳墓故宅在烏國朝六科崇仁舉進士第者惟家弟與友道才二人故云重見所以深明望於來者云

贈趙生

天門一日觀黃榜茅屋三年掩素扉
湘帙蠹魚春雨潤練囊螢火夜光微
夢游朔雪留鴻迹思入南山望鶴飛
會倚宮牆看射策上林初日炫朝衣

訪李真人不遇

退朝花底佩珊珊去訪真人曉出關
芳草欲迷行徑古

長松深護步廊閑
蒼龍挾雨得瑤簡
白鹿穿雲致玉環
如到天壇看月影
定知清露滿人間

賦壺洲

傳聞海上有玄洲
曾是安期舊所遊
千頃白雲都種玉
一杯弱水不勝舟
魚龍夜護黃金鼎
鸞鵠晨朝紫綺裘
波浪不驚星斗近
步虛聲裏度清秋

次韻朱本初訪李溉之學士不遇

城南城北煖塵飛
伐木相求苦未歸
吟到碧桃還細雨

行尋芳草又斜暉綺窗綵筆題詩徧斗帳沈香入袖微
共載小車勝上馬重遊莫待曉紅稀

寄趙子敬平章

聞道乘閒入翠微猶愁嵐氣濕人衣道傍野樹飛花盡
谿上春雲作雨歸故舊釣絲輕在手仙人碁局靜忘機
赤松曾許同千載擬向高秋傍鶴飛

仁壽寺僧報更生佛祠前生瑞竹有懷故園三

首

聞道故園生瑞竹試從來使問何如蒼筤獨出千叢裏
翠節駢生數尺餘比管可吹丹穴鳳長竿莫釣錦谿魚
折筵已向靈氛卜亦說能歸似兩疏

聞道故園生瑞竹令人歸興滿江干扁舟不畏瞿塘險
匹馬誰云蜀道難杜甫谿頭花匝匝孔明廟裏柏闌珊
新堂題作歸歟字定得臨江把釣竿

聞道故園生瑞竹吾家孫子好歸看佛祠竟日春陰覆
先隴多年莫雨寒門戶淒涼嗟老病鄉關迢遞報平安

重來慎勿勞余夢
駟馬橋邊據馬鞍

別國史院鰲峰石

執戟揚郎久不遷
頻年從幸到甘泉
賜歸特許先三日
作賦時令奏一篇
翠勺娛人花帶露
貂裘倚馬草橫烟
殷勤為謝堂前石
何處來秋共月圓

謝書巢惠梅花

巢翁遠送梅花樹
正在東風四日前
紅萼無言餘舊雪
白頭相見又新年
喜從嘉樹來江雨
憶共香航上海船

春夜不眠賓客醉只留孤鶴伴清妍

再用韻簡巢翁

豈無尊酒梅花側聞道長齋繡佛前方閣護雲宜煖日
小車衝雪稱高年頗辭閣下金蓮炬但乞湖中罨畫船
約取巢翁攜鶴去鬢毛同白不爭妍

送王君實御史

頓覺文星闕下稀旁人猶道此言非東風十日京城雪
西道三春客子衣鶯滿輞川君定到鵲啼劒閣我思歸

千花並繞圖書府相待承恩入紫微

送歐陽元功謁告還瀏陽

曉奉新書進御牀解纓隨見濯滄浪歸鴻不計江雲闊
倦驥空懷野水長竹簟暑風魂夢遠茶烟清晝鬢毛蒼

籃輿千里宜春道投老相求訪石霜

虞文靖父井齋先生嘗分教于潭見

歐陽元功所為文為之擊節繕寫成帙親題以寄文靖
時文靖為國子助教此題前一首云憶昔先君早識賢
手封製作動成編交游有道真三益翰墨同朝又十年蓋紀其實也

八月十五日傷感

宮車曉送出神州
點點霜華入敝裘
無復文章通紫禁
空餘涕淚灑清秋
苑中苜蓿烟光合
塞外葡萄露氣浮
最憶御前催草詔
承恩回首幾星周

送許有孚赴湖廣提舉

奉詔掄文祕殿西
才華知合籍金閨
思親浩蕩江波遠
戀闕遲回苑樹低
望鶴樓前移綵鷁
吟詩花底聽黃鸝
歸來尚覺春風早
鴈字充庭玉筍齊

賦石竹

積雪初消萼綠華東風吹動絳綃霞
龍噓石氣千年潤鶴過林陰一徑斜
刻字欲尋金錯落析旌如織翠交加
綺窗坐對吹笙煖未覺人間歲月賒

奉同吳宗師賦蔡七祖新齋

城南烟樹聽鶯啼石上莓苔覓舊題
自有琴心傳內景更將書帙事幽棲
晚來相鶴風生竹雨過籠鶯水滿谿
蜀客草玄成底事蕭條白髮愧青藜

寄來鶴亭主人

德清舊館何時到
雨後春泉定滿池
綠字久無弘景信
紫苔應長少霞碑
數峰烟樹天垂野
千頃鷗波雨散絲
海內交遊多老去
為誰谿上放船遲

送張兵部巡視運河

畫橋冰泮動龍舟
鴨綠粼粼出御溝
使者旌旗穿柳過
人家鳬鴈傍谿浮
桃花吹雨春牽纜
江水平隄夜唱籌
應有餘波方浩蕩
不令歸楫恨淹留

謝吳宗師惠墨

念我衰年不廢書錦囊古墨送幽居明窗塵影丹同熟
玄圃雲英玉不如敢為文章勝虎豹祇應箋註到蟲魚
研磨不盡人間老傳與兒孫尚有餘

三用韻答巢翁就以奎章賜墨贈之

鄰父長思長史書不辭頻謁惱巢居臨池三月玄霜盡
對月千篇白雪如賦敵洛波翔翠羽歌成湘浦媵文魚
故分瀘石松烟色猶是奎章舊賜餘

題著色山圖

江樹重重江水深
楚王宮殿在山陰
白雲窈窕生春浦
翠黛嬋娟對晚岑
宋玉少時多諷詠
江淹老去倦登臨
扁舟却上巴陵去
閒聽孤猿月下吟

題畫

緝熙殿裏御屏風
零落誰收百歲中
錦樹總含春雨露
畫橋猶是舊青紅
花開陌上懷歸燕
潮落江頭送去鴻
何似綠波生太液
絳桃風急綵船東

城東觀杏花

此詩誤見薩天
錫鴈門集中

明日城東看杏花
丁寧兒子早將車
路從丹鳳樓前過
酒向金魚館裏賒
綠水滿溝生杜若
煖雲將雨少塵沙
絕勝羊傳襄陽道
歸騎西風擁鼓笳

寄海南故將軍

海上風來五月秋
晚涼應上木蘭舟
金盤丹荔生南國
玉椀清冰出北州
狂客醉時花作陣
美人歌罷月如鉤
期門舊識將軍面
從獵還披翠羽裘

次韻宋誠甫學士城南訪病莫歸

騎馬城南覓舊題飄蕭席帽碧雲低東風花柳過韋曲
落日兒童唱大隄繡閣豈無和玉髓錦囊還有鑄金蹄
歸來吟轉樓頭月池冷芙蓉翡翠栖

題康里子山尚書凝春小隱六韻

羣玉府中香滿袖凝春亭裏看花開綵雲近席微風動
紅日當窗好客來西海珊瑚階下長東家胡蝶雪中回
竹深每聽尚書履池煥時分太液杯鳳味浮烟金錯落
鵞羣隨水白毡毼人間應得囑封帖青李來禽繞舍栽

次韻杜德常博士萬歲山

祕閣沈沈便殿西，頻年立此聽春鷗。
風搖翠岸新生柳，雨浥銅池舊產芝。
玉几由來常咫尺，衡門此日遂栖遲。
申生欲去柴車在，杜甫長吟雪鬢垂。
墨沼遊魚翻宿藻，畫檐飛燕睨晴絲。
山中竹簟涼如水，應共釣天九奏時。


次韻宋顯甫

御溝雪融三月初，鳬鷺鴻雁總來居。
蒲萄水綠可為酒，楊柳條青堪貫魚。
迤邐天河起箕尾，滉漾雲海浮青徐。

舟前花落傍飛燕隄上風來濕舞裾翠輦時留金轡裏
錦波不著玉夫渠臨流宋玉偏能賦莫待東都客問予

元詩選初集卷二十五

謹案第二十六頁前六行薩都拉舊作薩都刺今
改後倣此



總校官候補中書臣吳紹濬
校對官編修臣馬啟泰
謄錄監生臣呂學文